



KOMUNIKADO PA PRENSA

Fecha

12 di desèmber 2013

Account Manager

Jhanirha Anita

Email

jhanirha.anita@gobiernu.cw

Nr.

MINISTER BALBORDA TA ANUNSIÁ:

PLENCHI DI TRÁFIKO NA PALU BLANKU AWOR LO FUNSHONÁ KOMO UN ROTÒNDE

Willemstad – Minister Albordá di Ministerio di Tráfiko, Transporte i Planifikashon Urbano huntu ku Servisio pa Obra Públiko ta informá komunidat ku huntu ku Polis di Tráfiko, a disidí pa kambia e situashon di tráfiko na plenchi di tráfiko na Palu Blanku. Di e forma aki, ke yuda aliviá tráfiko na e punto prinsipal aki speshalmente den temporada di desèmber. Esaki ta enserá ku na Palu Blanku, entrante **mayan 12 di desèmber 2013**, lo konta reglanan di tráfiko manera ta vigente na un **rotònde**.

E kambio aki ta trese e siguiente benefisionan mesora pa komunidat, esta: 1) Rotònde a keda proba rònt mundu di ta mas seif, pues tin ménos aksidente na rotòndenanan kompará ku na krusadanan ku lus di tráfiko, 2) Fluho di tráfiko den un rotònde ta kore mas fásil, pues e lo aliviá tráfiko sigur, 3) A largu plaso un rotònde, ta sali pueblo mas barata, mirando ku na un rotònde no tin gastu di koriente i gastunan di mantenshon ta hopi ménos ku na lusnan di tráfiko.

Den un rotònde, semper e tráfiko ku ta den e rotònde, pues tur vehíkulo den kualke un di e dos via nan den e rotònde, tin preferensia. Pues tur vehíkulo ku ke drenta e rotònde, mester duna tur esnan den e rotònde preferensia dor di warda te ora esakinan pasa i habri un oportunidat seif pa nan por drenta e rotònde. Esaki ta e regla di mas importante ora ta kore un rotònde.

Tambe ta importante pa komo outomobilista, bo disidí promé ku bo yega na e rotònde, kua direkshon lo bo ke bai. Di e forma aki, na momentu ku bo drenta e rotònde, mesora bo ta den e via korekto ku bo a skohe pa kore aden.

E situashon aki ta unu temporal ku lo dura te ku aprel 2014. Na kuminsamentu di mei 2014, lo kuminsá rekonstruí e infrastruktura pa hasi e plenchi kompletamente manera un rotònde mester ta. A skohe pa hasi e kambio aki den desèmber, mirando ku e ta aliviá tráfiko inmensamente i a skohe pa hasi e kambionan den infrastruktura mes na mei 2014 mirando ku esaki ta despues di e periodonan di Karnaval i Seú. Asin'aki no ta stroba komunidat di disfrutá di su fiestanan nashonal.

Mirando e kambio grandi aki, Servisio pa Obra Públiko lo informá komunidat pa medio di un kampaña di informashon splikando kon mester kore awó na Palu Blanku. Tambe ta pidi outomobilistanan pa paga bon tinu na e señalnan den forma di flecha ku tin riba kaya. Nan ta indiká ki ora mester skohe kua via i tambe ku mester para promé ku drenta e rotònde (konosí komo 'haaiantanden'). Tambe lo pone bòrchinan di tráfiko ku ta indiká ku e



KOMUNIKADO PA PRENSA

Fecha

12 di desèmber 2013

Account Manager

Jhanirha Anita

Email

jhanirha.anita@gobiernu.cw

Nr.

situashon di tráfiko a kambia i lo tin bòrchi ku ta pidi outomobilistanan pa trafiká ku koutela na momentu ku ta yegando Palu Blanku.

Minister Albordá ta konfia ku esaki ta na bienestar di un i tur i ta pidi tur usuario di Palu Blanku pa manehá ku mas koutela. Tambe nos ta pidi outomobilistanan pa bai mas trankil durante e temporada di fin di aña aki. Por sigui e último desaroyonan di Minister Albordá via di su página di Facebook 'Earl W. Albordá, Minister VVRP'.